

四庫全書

史部

欽定四庫全書

史部

江南通志卷十五
六五

詳校官給事中臣丁雲錦

檢討臣德生覆勘

總校官編修臣王燕緒

校對官中書臣葉蒞

謄錄監生臣周丕

欽定四庫全書

江南通志卷十五

輿地志

山川 五 安徽

安慶府

大龍山在府東北三十里北障郡城如列屏展皖
封鎮山也上有龍井一名雷澤井四時不竭旱則
禱焉其東出者曰小龍山由大龍中出兩山相夾

如門者曰龍門山其北四十里有白麟峰又府北六十里有磨山

柏子山一名百子山在府西北二十五里羣峯疊出盤鬱聳秀最高者為雲峯山口曰獅巖奇石稜峭下臨溪水諸峯飛泉皆從此出山人種梅於此曰梅溪土性宜桃春日爛開如霞有嶺曰金坑為出山路口又西北五里曰甌山象山馬鞍山

鏡山在府西北四十里石色瑩澈如鏡北有豹嶺

多喬松又北有山並峙笏立者曰雙峯三峯疊秀者曰寨基山

獨秀山在府西北六十里舊志云形勢突兀為郡城衆山之宗其近者為桑山中多巖洞如層樓

黃山在府西四十里形如卧象當冶湖之口亦名象鼻山

大雄山在府西百里地名釋迦坂萃嶽峭拔俯視羣山皆兒孫拱立登絕頂望皖水如帶山之東四

十里曰愚公峯山之西曰俚子峯左右夾峙其相近有太平山

騰雲山在府西百三十里其上常有雲氣雲禱時應

盛唐山在府城中漢武帝南巡江漢至於盛唐登禮潛嶽出樅陽作盛唐樅陽之歌晉時郭璞登盛唐山謂此地宜城唐因置盛唐郡宋嘉定十年以黃幹知安慶請建城於盛唐灣宜城渡之陰即此

舊志以為山在桐城縣南正其地也云五里者誤
環山有二西環山在桐城縣西十里石門懸瀑最
奇明參政胡瓚三世居此一名官莊山東環山在
縣東三十里一名魯叅林壑窅深與官莊相望舊
傳魯肅遺蹟有試劔石又十五里有麻山

龍井山在桐城縣西十二里有龍潭深不可測溪
山明秀如畫西有烏石山栲栳山又西有五聚山
王屋山皆邑名勝

碧峰山在桐城縣西北七里沿澗入南崖壁立千仞下有四洞可容數千人其側有披雪洞尤勝瀑水懸崖如練

龍眠山在桐城縣西北十里岩壑幽邃擅名江北與華崖山並峙宋李公麟歸老於此自繪龍眠山莊圖縣有東西兩龍眠與舒城縣連界

投子山在桐城縣北二里相傳吳魯肅有子投此為僧因名後為唐大同禪師道場有三鴉伺曉二

虎巡廊之異上有趙州泉趙州和尚飛錫得泉處
石門山一名石門冲有石如門瀑布尤為奇絕

北峽山在桐城縣北四十里即古峽石山以在縣
北故曰北峽兩崖相夾如關又名北峽關又西峽
山在縣北四十七里魏張遼救皖至此築壘峽石
名南峽戍

洪濤山在桐城縣東北四十里山高廣每天雨則水
下沛若濤

桐梓山在桐城縣東三十里峯巒明秀雨霽尤佳
大凹山在桐城縣東四十里平地突起突兀嶙峋
多怪石為東鄉羣山之祖

浮山在桐城縣東九十里一名浮渡山寰宇記其
峯七十有二有石龍如來抱龍諸名而妙高最高
其巖三十有六有會聖金谷九曲首楞晚翠五雲
翠華海島諸名而大通飛瀑最奇鍾惺記云以為
無巖不樹無徑不竹無石不苔無澗不花也西南

有獨峯直上千仞

附

明方學漸浮山賦

晚襟三江以山為國

桐據其曲四塞皆山龍嶽襟其南麟嶺峙其北華
崖障其西玉山表其東崇峻瑤瑋出霧蒸雲壯觀
具矣元覽畧馬惟浮山盤鬱於中勢不甚高而崑
洞天開石溪地湧若神鰲夫戴瀛閭靡依海湖乍
驚浮空洸蕩奇踪異狀不可殫述名曰浮渡所從
來矣仙侶釋徒棲神代有梵宮躡址道院負嶼信
依麓秋颺春煦躡躡孤登曠矚怡懷驟然賦焉
繫鴻蒙之未泮兮肆瀕洞而沈洳施渾沌之肇開
兮峙者結而流者瀆記蓬瀛於瀚海兮賴鼉屬於
巨鰲曷吞釣於任公兮致元閭乎浮滄來吾桐而
凝上兮奠洪基於江曲爰錫名乎浮渡兮儼方舟
而崛岉表天柱以為榦兮索地維以為纜石崢嶸
而夾枕兮繫九疑於澗澗乍鯨濤之震撼兮飛鼉

浪之澎湃走蛟鯨于白晝兮嵐岌岌而駭潰卧蟪
蜩之磴磅兮試虬龍于碧波鳥雲迤以上達兮扶
羊角而斜過徐洞口之劈剗兮柱差莪其竭石羌
龍虎以鍵關兮若旆懸而骨立湛五蓮之爛漫兮
浴紫芝於元渚鳴金雞于嶠廓兮開繡闥於瑤圃
乃有危巖三十六兮堪徙倚而遊之別洞七十有
二兮各獻媚而爭奇越陸子而會勝兮列峭嶼而
凌漢呀崔嵬而喋喋兮刻嶙峋而澶漫窺香闕之
輿突兮踞淋漓之石林啟冰壺之冽井兮漢沆瀣
之瓊漿麗層空而軒豁兮挺複樓於巖表結磊砢
以為廊兮敞玉虛而浩渺兮更石梯乎遶雲兮千星
象而躡虹鳥道疑其莫度兮遠逕畏其難通轉側
升而附螭兮乃旋近于桑日誰杵藥而飛翰兮留
荒臺于萃萍緬野夫之芳韻兮蠟丹穴以俟來度
仙橋於蜘蛛兮布碁石于菴苔盼龍池之孤潁兮
指拔茅之雄峯眺華封于天外兮控皖嶽于雲中

塹崇巖而汨汨兮，碎天池以成壑。似清淺而沉沉兮，泌靈猷而罔涸。偃兔宮以肖月兮，翫鷲而朝陽。拂紫霞以度關兮，踞元豹而踰跟。瀉明河之倒液兮，滴晴空之飛瀉。誰濟源而長流兮，洩尾閭而焦沃。載高巖之逼斗兮，竊岑樓以奠居。煥琳宮於金谷兮，宅深昧而於妙。元會于總巖兮，盈方丈而備巧。闕日月于蓬壺兮，約勝槩于渺小。何大冶之型埴兮，置馮夷於天台。激崇陵以瀆洋兮，參蜃氣於層臺。爰縱觀乎寶藏兮，奚珍錯之不具。紛縱縱而萃萃兮，極霄壤以加富。馴擾乎青麟迴翔乎朱雀。虞虞乎元臺，嗷嗷乎白鶴。龍隱乎石池，虎伏乎林薄。肅肅乎月，狙狙吟風乎鵲。鵲蔽日乎松杉，參天乎杵栢。脩竹乎綠漪，茂篠乎翠囀。馥郁乎桂叢，芳芬乎蘭若。垣合乎千葩，薜蘆乎百藥。每青陽之啟運兮，流景輝而彌光也。游士女而絡繹兮，道擊鼓而聯棠也。即扶氣之搖落兮，灑羣英而履霜也。

飛鳥戢而崆峒兮清風肅而琳琅也逝朱陽于昧
谷兮若海曙之初陽也返烟光而生色兮何夕爨
之多祥也是以仙命侶而乘勝俯雲閣而下樓釋
絃經于密室坐碧玉而忘機騷人發其刺劄宣金
石而振警哲士慕子牟蘭輕千里而嚮往邈太古
而同徵幻左慈于漢末紆宏景之相猶潤曹松之
詩索巖屢託于前哲墓猶指乎速公暨歐蘇與僧
瑞尤倡和以同風若乃藉阨塞以屯戍若崎嶇而
禦恭異賦武於貌狝匪祗靈之攸好白沙嶺之卜
禁防明亦欲選奇則有道之振鐸樹茲土之鴻儀
親華嚴之廢址憐梵宇之荒唐欽賢館之壯麗將
正學之寔昌稟二儀以握珍對十仞而仰止期不
負於斯山暢幽懷而莫己亂曰麗姿厚質乃中虛
兮廓然有容君子居兮龍潛瓊伏越羣儔兮勿謂
嶮阻君子求兮清源冽冽石其爛兮君子飲之渥
若丹兮巍我屹屹天柱尊兮峻極穹窿我則欽兮

先登者誰陟其顛兮
漱泉枕石洞其天兮

青山在桐城縣東百一十里有金雞洞石鼓又有
石屋寺相傳晉裴仙修煉之所草木秋冬亦青

函山在桐城縣東百二十里瀕江又名蓮花峯上
有煉丹池風洞西有周家山竒峰參天元郡丞陳
公寧墓在焉

合明山在桐城縣東百三十里兩石相向天欲雨
則瑩然有光西有柳峯山勢如雲奔浪疊竒秀特

異

黃公山在桐城縣東南九十里明建文時黃觀靖
難後顯靈此山土人立祠祀之

黃連山在桐城縣東南百里峙湖畔與樅陽山相
望懷潛舒桐四邑之水俱會於此為桐邑關鎖馬
擣蒲山在桐城縣東南百十里有二石各高六丈
如兩人相向擣蒲狀因名舊志在縣東北十里誤
磨旗山在桐城縣東南百二十里世傳闕公曾於

此駐兵有寨有鎮相近為靈山上有靈湫俗名琵琶山

瀟山在瀟山縣西北二十里一曰皖山又曰天柱山漢武帝南巡登禮瀟之天柱山以代南嶽故一稱霍嶽又謂之副南嶽名山記明李元陽以為其麓有漢祀壇是也山高千仞廣二百三十里周五百里六安霍邑在其北安慶瀟邑在其南二邑皆以此山名縣一瀟一霍實無二山也周大夫皖伯

封國亦以此山名上有左慈煉丹房東有激水冬夏懸流瀑布萬丈瑩然如雪故又名雪山下有九井深不可測旁有石牀可容百人計峯二十有二嶺八巖十有二源四洞十池三臺四疊嶂層巒空青積翠瑰竒秀麗不可名狀實為淮南江北諸山之冠其支山曰三祖山有璨師塔一名山谷宋黃庭堅寓此取以自號或有疑天柱山有二漢所稱南嶽乃霍山之天柱與灄山

之天柱無涉而指霍之武陟指封諸山為証云霍有登封遺跡灄則無之也按漢書武帝紀云元封

五年行南巡狩至於盛唐登禮灃之天柱山自潯陽浮江親射蛟江中獲之舩艦千里薄樅陽而出作盛唐樅陽之歌史記綱目亦云盛唐在今安慶府治內潯陽樅陽乃灃山之上下境向使武帝登禮天柱在霍而不在灃則胡為必云灃之天柱而上下所歷之地皆在灃山且胡不作武陟指封之歌而獨歌盛唐樅陽乎豈史漢綱目諸書反不足信於雜說小記乎山之北流曰泚水亦名泚水由霍入淮山之南流曰皖水曰灃水由灃入江今但云泛江而不云泛淮則燔柴昭事必在今灃山境內可知矣彼又云六安霍山於漢魏晉宋俱稱灃所稱灃之天柱即以霍山言也然歷考諸史六安本屬六國皖灃乃安慶境地東漢時安慶屬廬江郡隸揚州唐元和二年改為六安國續文獻通考云唐以霍山縣置霍州後州廢仍為縣梁改灃山縣宋改六安軍據此則六安名霍山又名灃山灃

山為六安又為霍山 皇輿圖表所云六安接壤山川連跨故諸書多互見之文是也此瀾彼霍縣雖分屬而天柱實無二山又可知矣據邑人金燕記云爾雅云霍即天柱山瀾水所出水經云霍山為南嶽在廬江瀾縣西北閩衡山志別無霍山則瀾山亦名霍山矣又按舊志謂皖瀾天柱為三山燕曾親陟山椒見峭拔如柱屹然獨尊者一峯耳曰瀾曰皖曰天柱即此山也其飛來三台等峯具有名稱且與此山絕不類從古說山者曰舒州瀾山最奇絕曰青冥皖公山巉絕稱人意曰天柱一峯擎日月此一山三峯之左券也皖以中一峯為天柱而以旁連者為瀾為皖乃縣以瀾得名郡以皖得名洞天以瀾山名周大夫稱皖伯舍其大者名其次者必不然矣

玉鏡山在瀾山縣北寰宇記唐貞元二年從皖山

東忽然暴裂皎瑩如玉行人遠見如懸鏡然刺史
呂渭奏聞因改萬歲鄉為玉鏡鄉故一名玉照山
黃庭堅詩仙人持玉照留在潛峰西是也山東有
主簿山相傳唐畢誠讀書於此

鳳凰山在潛山縣北十里宋王珪故宅在焉又有
黃山以黃魯直得名

牛眠山在潛山縣北七十里以形似名麓有金鍾
潭甚深又北三里曰水吼嶺控天堂之勝

天堂山在潛山縣北百四十里四壁高峻中敞如
堂內有溫泉龍湫又有黃沙碎石青風飛旗諸嶺
及主薄原雙乳峯其相連者曰羅源後霍公蓋金
龜鯉魚及東山後山羸山左右環合稱為絕險
閩山在潛山縣西八十里有果老嶺產茶甚佳
駕霧山在潛山縣南三十里山高峻雲霧常出其
下

白雲山在潛山縣南八十里絕險壁立上有平坡

懸橋以升

龍山在太湖縣西北三里蜿蜒如龍磅礴多石下有龍湫王安石詩吾欲鞭龍起為霖遍九州此山是也

石船山在太湖縣西北六十里有石如船多題咏司空山在太湖縣西北六十里高聳獨出如在雲表其上平坦可數畝謂之司空原淳于司空曾居此有洗馬池冬夏不涸有太白書堂又有巨石相

傳為釋慧可傳衣處

新寨山在太湖縣西十里壁立險阻元末立寨其上

龍門山在太湖縣西十五里兩山對峙若門上有龍泉聲如雷激又西五里有夾羅山又五里有松山又五里有九重山

香茗山在太湖縣南四十里左曰小茗右曰大茗大茗尤高峻產硃砂險不可取上有煉丹處為梅

福遺跡南與望江界去大茗十里曰嵯峨山勢極
嶙峋故名亦界望江

四面山在太湖縣東北十里形方而銳四面如一
又縣東北三十里有白雲山

獨阜山在太湖縣北四十八里迥出羣峰之上有
石刻隴西二字舊傳李白曾避地於此

百藥山在太湖縣北七十里相傳唐白居易曾居
此後以白樂名山絕巘有洞時聞異香懸溜可愈

熱疾又傳高真人修煉之所石牀丹竈尚存

珠子山在太湖縣北百八十里孤峭干雲上有關與英六為限

浮玉山在宿松縣東二里邑十景所謂浮玉青峰也又縣東三十里有安峰山月山

鑿山在宿松縣東十五里有石洞玲瓏口隘而中敞稱名勝

烽火山在宿松縣東六十里北齊及陳割以為界

有警則舉烽火於此

響石山在宿松縣東南七里履之輒響如擊鼓然
又縣東南十七里有天韭山韭不蒔而生七十里
有金唐山八十餘里有芙蓉山

小孤山在宿松縣南百四十里初山在江北岸與
南岸澎浪磯相對江流至此湍激如沸海潮不得
上元天歷中立鐵柱于山曰海門第一關上有石
級百十有一紆迴而登明成化間北岸衝決為廣

流遂獨峙江中勢分險殺而山愈峻拔

得勝山在宿松縣西四十里元余闕敗陳友諒于此

翠眉山在宿松縣西北五里小巒獨立河水環照山影若修蛾見于鏡中又五里曰靈隱山相傳馬祖禪師于此卓錫

銅鈴山在宿松縣西北三十里山界大路為八省通衢外陡中平若城郭明末撫臣史可法嘗駐此

防禦流寇名曰同人堡

西源山在宿松縣西北五十里上有九井不竭井側有龍祠禱雨輒應又縣西北七十里有摩旗山其峯如捲旗

陳漢山在宿松縣西北八十里與蘄黃界昔有陳漢者結砦于此因名

巖恭山在宿松縣北三十里上有石長數十尋儼如人立號石道人相傳以為修真者所化也又縣

北四十五里有石門山五十里有白崖山與太湖英霍界六十里有張公山

孝感山在望江縣北十五里南畿志云唐貞元中孝子徐仲源所居旌其鄉曰孝感亦以此名山

磨叉山在望江縣北三十里有巨石如駝象形又有磨叉痕及馬蹄人跡亦有穴如泉空洞莫測

寶珠山在望江縣北五十里巋然衆山中圓淨如珠

石灰山在望江縣西北六十里亦名石輝相近有
鷓鴣山

值雪山在望江縣西十八里上有平岡相傳李白
遊此值雪因名

大茗山在望江縣西北六十里嶺有巨石廣數丈
屹立雲表上平如底烟嵐常翳其半其旁出者曰
小茗有蓮花峯峭峻秀麗南畿志云唐羅隱曾居
此

脊現嶺在府北十五里大龍山之脈伏而復見聳起如脊故名後訛為集賢

長安嶺在府西三十里路通潛山宋王安石有曉發長安嶺詩即此相近又有龍見嶺

子貢嶺在府西四十里相傳端木氏往楚道經此又西有山離立衆山中如筍拔地曰虞公峰

峽石嶺在府西五十里山高數里澗水潺湲古木環澗層鎖如入武陵源

挂車嶺在桐城縣西三十里三國吳朱桓謂峽石
挂車兩道險隘即此

黃栢嶺在桐城縣東百二十里有南北二嶺路通
無為州界又近城二十五里亦有黃栢嶺通舒城
小隘嶺在宿松縣西八十里阻山臨河路接荆舒
為防守要地

分茅嶺在望江縣北六十里與太湖縣界本作分
畝嶺

白雲巖在桐城縣東百三十里有東西兩巖相峙
又有四峯三洞五小巖名勝與浮山競勝相連有
雙尖山牛角尖俱極秀聳

雷公崖在太湖縣西北六十五里削立萬仞相傳
其上曾有獸如猿色赤而小喙尖翼短狀類雷神
故名

豎筆尖在桐城縣東一百里卓立如筆竒秀峭拔
為一方諸山之冠縣南百里外雞籠山側亦有豎

筆尖奇秀相等

大江上游自蘄黃東滙潯陽彭蠡之水至小孤山
入宿松界過望江繞郡三面至池口經桐城之樅
陽東北至灰河入無為州界

長河在府西有二源一北自皖山一西自司空山
俱會于石牌行七十五里至皖口又十五里入于
江

灤河在府西七十里合潛水達長河入江

青山河在府西七十五里出西源山合潛水達灤河入江

積石河在府西北三十里俗名馬嘴石河又東南流十里匯為石門湖

高河在府北八十里合黃馬河諸水達桐城之練潭合樅陽河入于江

雙河在桐城縣東三十里一曰東河源出洪濤山一曰西河源出魯砮麻山至此合流下經孔城由

樅陽入于江

樅陽河在桐城縣東南百二十里西引石塘北受練潭連孔城河東入于江

沙河在潛山縣東六十里下合桐城之練潭入于江

九井河在潛山縣西北二十九里源出九井合于潛水

羅溪河在太湖縣西北二十里出司空山流經

縣西匯於馬路河東流至黃泥港會于潛水

後部河在太湖縣西北百二十里納羊角銀河之水而東南流合龍灣河達于馬路河又縣中洪渚思常棠梨南陽白沙馬路諸河與後部河俱匯黃泥港合潛水流入于江

三溪河在宿松縣西北六十里源出蘄黃流分為三匯于隘口又南三十里曰二郎河上接三溪下接清灣為郵傳要路每遇山漲急流深不可涉又

至縣西一里曰鈎餌河

楊溪河在望江縣南五里其水東泊湖之口亦曰
澈水口有三十六斷從縣南十五里之華陽鎮入
於江

埭溝河在望江縣北六十里受潭湖諸流至皖口
入江

蓮湖在府東十二里亦曰段塘湖多蓮菱故名上
割江中水出長楓下趨梅林達樅陽入于江

冶塘湖在府西三十里湖口有石庫渡下流出皖
口入江

竹子湖在桐城縣東百二十里合白蕩破堽二湖達
源入于江

洋洞湖在桐城縣東北百八十里汪洋萬頃故名
湖饒魚蝦之利每遇大旱自生蓮藕環湖民賴之
以濟又有楓林河沙河山西河皆巨浸水出灰河
入江

獨山湖在桐城縣南六十里又有松山喜園亭鴨子石石塘諸湖與此水俱出樅陽

南湖在潛山縣南一名靈湖三面倚城多古木潯泓涵浸宜于植蓮

鮎魚湖在宿松縣西南三十里又十里曰泥河又五里曰牌湖又十里曰麻湖皆通大江

鮎湖在宿松縣西南八十里周圍廣濶產鮎魚故名西南入于江

龍南蓮若湖在宿松縣南四十里中有小洲曰浮笠洲湧若螺黛隨水上下其水連白荊棠梨小黃諸湖至望江縣入于江

泊湖在望江縣西四十里自宿松縣界龍南諸湖及縣西境之水俱匯于此經縣南楊溪河而東入于江泊湖西五里有鱗湖亦自泊湖分流達于楊溪河

武昌湖在望江縣東北三十里受諸山水及縣北

諸川之水匯為湖廣袤數十里又東北十里為青
草湖接白土湖

漳湖在望江縣東北六十里受武昌青草白土諸
湖之水北經埭溝河至山口入于江

桐溪在桐城縣東其源出龍眠華崖繞城西而南
達樅陽入于江明永樂間邑令胡儼所鑿至今賴
之

長風港在府東北四十里引蓮湖槐湖之水下入

于江亦名長風沙今有長風渡自此渡江達池州

源子港在桐城縣東百四十里出老洲入于江

黃泥港在潛山縣西南三十里太湖縣境之水匯流于此合潛水入于江

皖水在潛山縣西北二十里源出皖山龍潭下流為崩河合于潛水南經府城東至皖口入于江

潛水在潛山縣西北二十里源出潛山合皖水達郡之石碑入于江

白水源在潛山縣潛山西南衆山環之飛瀑千丈
景物絕佳

桃花潭在宿松縣西二里上河口相傳汪倫送李
白處

清官潭在宿松縣三里水清澈則官清否則汙濁
甚驗

桑落洲在宿松縣西南百二十里九江口晉劉毅
與盧循戰于此

孟洲在宿松縣南四十里環洲皆湖地廣饒宜畜
牧其相近者曰黃陂洲多黃壤又南四十里曰楊
柳洲

盡忠池在府西舊名清水塘元余闕殉難于此因
名南畿志童翼詩遺老能言當日事寒泉猶照死
時心即此

洿池在宿松縣東南六十里衆水所匯池環于山
中列市廛居民饒魚鹽之利

張富池在宿松縣東南八十里其水趨泊湖達雷
港入江

大雷池在望江縣東三十里源出宿松界東行二
百餘里經縣東南積而為池又東十五里入于江
一名雷港又名大雷江

新溝在宿松縣東南七十里明初俞通海開溝三
十餘里引大河達涇江口入江

徽州府

靈山在府西北三十里寰宇記云山有香草名曰
靈草上有靈壇不燒香自然芬馥文獻通考云歙
縣漢有靈山有石如車蓋天欲雨先聞鼓聲又有
紫霞浮丘雲林仙姑豐山葛山小武夷長春諸山
俱相近

黃山在府西北百三十里舊名黟山唐改今名山
盤踞宣池江浙諸郡而為鎮于巖高一千一百八
十仞世傳黃帝與容成子浮丘公煉藥于此故有

浮丘容成諸峰漢末會稽太守陳業遁跡此山有
有三十六峯水源如之又有二十四溪十二洞八
巖詳具山志郡國志稱天目高二萬仞而低于黃
山者以徽郡已與天目齊而此山又特高鄰郡諸
山皆此山之支壠也山上諸峰有如削成烟嵐無際
雷雨在下其霞城洞室巖竇瀑泉則無峰不有信
為靈仙之窟宅也山中多黃連紫朮有湯泉出香
溪中常湧丹砂浴之愈疾西北類太華故前世亦

名小華山

附

元汪澤民遊黃山記

黃山在宣歙境
雄鎮東南山之

陽踰百里為歙郡治其北三十里為太平縣又北
抵宣治所二百四十里不當通都大邑舟車之走集
而遊者罕至今年四月九日余始得遊焉山西之
麓田土廣衍曰焦村蓮峯丹碧峭拔攢蹙若植圭
若側弁若列戈矛若芙蓉菡萏之初開雲烟晴雨
晨夕萬狀由焦村南道二十五里至湯嶺仰視羣
峯猶在霄漢間峭阜蟠結鑿石開逕嵯岨危瀑
有聲勺隱如雷怪石林立半壁飛泉灑巾袂當新
暑凄然而秋又十里憩祥符寺寺前淙流走萬石
間山皆真松名材藤絡莎被菡萏龍草下有靈泉
自硃砂峯來依巖連二小池上池瑩澈廣可七尺
深半之毫髮可鑿泉出石底縈累如貫珠不絕氣
秘醇若湯酌之甘芳蓋非他硫黃泉比也明日試
浴垢旋流出織塵不留令人心境清廓氣爽體舒

相傳沉疴者添雪立瘥理或然也寺有南唐碑初
名靈泉院宋祥符中改今額又龍池距寺左三里
許奔薄瀉石潭中亭午焰燭五色璀璨誠靈物所
居夜聞啼禽聲甚異若歌若答節奏疾徐名山樂
鳥下山咸無有行寺旁近見數峯凌空僧指云共
蓉硃砂其尤高者天都峯也上多名藥採者裹糧
以上三日達峯頂余心甚欲遊之而鳥道如線不
可乃止凡再宿寺中遂至焦村之二日行十里遊
翠微寺古松修篁石澗橫道僧橋馬覆之屋以息
遊者清冷靜邃已隔塵襟余為榜曰翼然至寺庭
有井泉僧言此麻衣師卓錫處泉亦清美不涸不
溢一峯卓然獨秀直峙東南隅曰翠微峯其條支
迴互寺居盤中故諸峯俱隱不見明發行十五里
過百沙嶺往往攀崖壁牽蘿蔓或小木貼巖若棧
而度幾不容武旁臨絕壑惴惴馬不敢俯而窺又
七里至絕頂頂平廣倍尋方據石少休時晴雨旭

霽氣象激潔環視數百里岡巒虛落歷歷可數九
華綠翠若蓮開陸焦村向所見峯皆平挹座間俄
頃白雲涌起遙山近巔如出沒海濤僅餘絕頂嵯
泝天漢中條又欲截如掃如是者三可謂奇觀矣
日暮抵寺亦信宿焉又二日從村北十里登仙源
觀至元中新安吳萬竹習靜茲壤嘗行易宛陵誇
詡其勝余贈詩還山今竹存而吳逝已久林阜周
密南列翠峯鍊形引年者固其所哉既還憩吾宗
公仲雲松樓越十日踰興嶺而南所謂三十六峯
者駢列舒張橫絕天表衆岫疊嶺效奇獻秀盡在
一覽行田疇竟迴登橫嶺陟小丘道在竹杉陰森
中小徑縈紆屋纒數間一僧奇龐近八十者若進
果自言結構力田間則持經翫空歷二十閏矣門
外營草亭往來休馬庠陋將壞余將改築亭之右
文餘南峯翔舞迎乎前北隴奔躍駐乎後左右翼
如景益清名之芙蓉亭而未暇也循巖曲抵白龍

潭巨石錯錯澗洶湧衝激深不可測歲旱禱雨立至
又皮板橋有小庵食澹苦修數輩居焉嘗有逃空谷
者出奇方療人疾頗衆既亡痊浮圖中余特徵夫
山水軫繞自奧可屏塵事遂宿焉聽泉而去道途
為里若干皆樵牧負販者隱度云然非有堦以步
而計也昔大德茂茂歲得茲山圖經神思飛越而
因循皓首甫幸一至至又弗克久留而去每登山
時宿雲收雨紫翠如沐山下之人皆以為山川靈
英有相之者余亦竊自喜因思向在南安之日造
南源山禱雨龍湫跣裼亂石急流中腰纏梯藤登
懸崖上而後下至潭所其巖險視茲行為甚是故
樂清賞以酬宿昔忘躋攀之勤而不知高深之為
懼也余當謝事與二三友結宇讀書以畢餘生較
之充拙于聲利而不知止足者不猶愈乎時至元
再元之六年
庚辰歲也

聖僧山在府治西舊志云唐武德間僧慧明居此
故名下有泉曰靈塘左為洗眼池巔下有石曰仙
人幢南渡時有道人居此明汪道昆為僧自明創
般若臺馮夢貞謂之蓮花國土又府西十里曰師
山曰太守山

龍山在府西二十里宋處士鮑宗巖子壽孫所居
父子遇賊爭死于此揭侯斯以慈孝名其堂上有
慈孝松見古蹟志

黃羅山在府西三十里府志云豐趾而銳首俗稱南極壽山相近者為黃牢山所謂西有黃牢之塞也古蹟志云山麓有黃隱樓距黃羅五里曰天馬山又有魚袋山文几山南山西四十里曰金竺山幔亭山在臯嶺之巔有點石突雲表古松蔭蓋俯瞰羣峯攢簇如屏垣汪道昆呼為幔亭詩云烏石古松團翠蓋黃羅絕巘入青雲指此

城陽山在府西南寰宇記城陽迴環甚高為城郭

襟帶唐景雲中許宣平隱山之南塢一名南山又
號翠微峯取宣平穿雲入翠微之句也山椒有穿
雲亭上有仙燒峯分桃石豐隆嶺丹地浴仙池諸
勝

紫陽山在府南三里高百九十仞府志云宋婺源
朱松遊而樂之後寓閩中常以紫陽書堂刻其印
章其子燾亦以紫陽名其堂示不忘也山南有許
真人丹池池有翼魚四足而色蒼狀類蝮蜓舊志

謂即陽城山誤

萬紫山在府南府志一曰鍾洪山高數千尋上有池曰天塘旁有故址傳為寶誌修道處北有觀音巖懸岩可蔽數百人近岩有金鷄石矗立雲表有赤文綠字俗傳能讀此金雞飛鳴羅隱過之果驗龍井山在府南亦名鶴頂山府志云橫截練江雄挾魚梁其澎湃之音驚川聒谷古傳宣州刺史訪仙待渡于此俗所謂訪仙橋也上建禹廟

岑山在府南十五里大溪之中其頂平夷府志云
元鄭玉嘗結屋其上讀書更名曰小焦山下為鄭
公釣臺詳見古蹟志又南曰李田山二十五里曰
孔靈山晉孔瑜讀書處三十里曰石岫山

石耳山在府南四十里府志云峯石皆倒垂如蓮
瓣多藥草

烏聊山在府城內東南一名富山漢末邑人毛甘
以萬戶屯此元和志云上有毛甘故城隋末郡人

汪華據郡亦屯兵于此今有汪華廟亦稱廟山下有仙姑井宋鄭仙姑所居其北曰萬山又東北曰斗山一名七里山又有東山

問政山在府東五里一名華屏山唐有于方外者自荆南掌書記棄家學道于此其從弟德晦刺歙州來訪之德晦為菴室山上號問政山房山椒有高眉峯有萬仞花屏亭興道觀又有鐘樓峯峰後有寶相寺有泉甚甘冽相近為石壁山紫芝山

飛來山在問政山西相傳昔日有鳳飛來于此生
八子上有鳳岡精舍處士畢元所棲商輅題額即
秀野莊也入山小徑旁有朱子外祖祝氏舊居祝
遷崇安朱子闔歸過之題舊時山月四字即兵馬
使畢力忠長春園

紫金山在府東三十五里府志云舊名金紫山相
傳暮夜每有光見宋紹興十八年尚書章侯觀
而異之因取佛語改名紫金徙白蓮院于其上旁

有瀑布曰球泉九派飛流鳴球發籟如挹百斛珠
又五里曰大金山十里曰萬羅山

玉屏山在府治東北端峙若屏風泉傳響常吐飛
溜下廣寬可屯軍明太祖定徽駐蹕山椒前代謂
之玉帳遺蹤京兆畢懋康構西清館池產紅白并
蒂蓮又顏云華萃山又東南曰馬鞍山又西曰白
龜山

雲嵐山在府北七里唐越國公汪華葬此俗名雲

郎又府北十五里有鳳凰山舊產茶名甘白香

飛布山在府北二十里舊名主簿山昔有主簿葛顯率邑人保聚于此唐天寶中改今名上有甘露

洞

鳳凰山在休寧縣西二里一名靈鳥山地理志云孫吳時休陽縣治在此

白嶽山在休寧縣西三十里奇峰四起絕壁斷崖有飛動之勢遊齊雲者必先登焉

高湖山在休寧縣西百二十里南接婺源山椒有湖四時不涸人稱聖湖又西北五十里有鹿牴山率山在休寧縣西百六十里一名張公山古云昔有張公隱此故名山由五嶺西北鬱積而來高千數百仞盤踞休婺之間鄱陽浙江之水皆源于此

古為三天子都亦稱三天子鄣相近有黃竹嶺岡隴盤鬱連饒州浮梁界常置巡司附明吳度三天

子都考

吾郡三天子都亦稱三天子鄣其說肇自山海經諸家解釋惟汪氏之記為允

經曰三天子鄣在閩西海北又曰浙江出三天子
都在率東又曰廬江出三天子都入江彭澤西張
氏土地記云東陽永康縣東四里有石城山上
小石城云黃帝曾遊此即三天子都也其說不足
取郭璞注云今在新安歙縣東謂之三王山浙江出
其邊也又云浙江出新安歙縣南壩中東入海今
錢塘浙江是歙即歙也其說操兩端一謂在歙一
謂在歙且謂歙即為歙尤為背謬蓋漢時吾郡止
歙歙二縣其後析置諸縣今休寧祁門婺源皆析
自歙績溪析自歙鹽理各別豈容混稱一統志引
經云三天子都在率山今在休寧縣俗名張公山
何喬遠輿地記云休寧縣山曰率山水曰率水山
海經浙江出三天子都山在率東其說漸為近之
惟汪循率山記更為詳確記曰或以績溪大鄣山
為山海經所稱三天子都非也水經漸江水出三
天子都在率東廬江出三天子都入彭蠡今惟率

山之水山陰山陽一東一西而流入于江者與古
胞合常遊率山見巨石上鐫三天子都字即三天
子都也其說詳確不可易矣大抵言山必徵諸水
言水必徵諸山若禹貢導河積石嶧冢導漾之類
徵諸水者也南至華陰東至砥柱之類徵諸山者
也故禹貢為千古記山水之要典汪氏以浙江廬
江二水為證始知三天子都所在得禹貢遺意矣
近日吾邑有老生強謂解事云三天子都分在三
處而黃山擅其一其說疊疊可聽而漫無根本適
吳下有顯者未遊黃山遂取而載于遊記不知吾
邑溪水十餘支皆編竹為泝而行惟休寧率山之
水足通舟楫黃山雖奇秀其趾有水名豐樂溪亦
與眾溪相類即水經注所謂小溪之一支耳既非
浙江所自出與經不合安得指為三天子都乎故
言三天子都者惟汪氏之記為允
余故詳為辨之俾後人無滋惑焉

戴公山在休寧縣西南五十五里河村戴彥明開
為三省通衢

顏公山在休寧縣西南六十里古有顏公隱此因
名中多異蹟山之高自麓至巔可三十里

錦堂山在休寧縣南十里孤峯特立趾圓而頂平
宋江慶受業胡瑗歸結廬此山以淑其徒

白際山在休寧縣南八十里其山由五嶺而來連
峯不斷下有元萬戶吳納與胡大海戰地又縣南

九十里曰雞籠山

方原山在休寧縣南百一十八里本名黃土山唐天寶六載改今名又名馬金嶺其陰則水北流入率江其陽東流者入于睦之遂安西流者入于衢之常山界而皆趨于浙江又南曰烏龍山陽昕山遊仙山在休寧縣東南三十五里平地特起南有石壁削成數百尺呼之輒應又名響山又東南七十里有仰山路徑險絕號十八盤

萬安山在休寧縣東十里府志云即萬歲山一名
古城巖隋末汪華築郡城自黔徙治于此宋宣和
間改今名明洪武時復名萬壽山山麓兩石夾立
如門萬曆間縣令祝世祿建還古書院

稍雲山在休寧縣東北二十三里武洪之水出焉
舊名郎山唐天寶六年改此今名榔原山

松蘿山在休寧縣北十三里俗名金佛山蜿蜒數
里如列屏障于縣治後山巔片壤產茶為天下最

相連者曰天葆山三十里曰萬松山

東山在休寧縣西北十五里元趙汭從江西黃澤受春秋歸精舍于上虞集記之

白鶴山在休寧縣西北城中有李花塢春月如瑤林下有泉名東山泉

軍營山在婺源縣城內西北隅古志云有五代屯兵營址山形類蚺蛇蟠結昔稱蚺城縣治立焉

天堂山在婺源縣西北四十里為邑治龍脉山甚

奇秀又十里曰船槽嶺峽為龍脉過峽處明嘉靖
後居民鑿石燒灰傷脉歷任邑令皆刻石嚴禁

查公山在婺源縣西城外府志云南唐宣歙觀察
使查文徽及宋御史查陶二墓在馬文徽與邑令
廖平講學于此後人刻其山之石曰查公山廖公
泉

石老山在婺源縣西六十里三峯聳秀頂上廣數
百畝有吳王墓有龍潭其東為古城山外峻中平

出口處僅丈許宋岳飛嘗屯軍其中

濬源山在婺源縣西百一十里西南連浮梁樂平界又名鳳遊山濬源之水出焉山畔有大安洞

梅源山在婺源縣西百二十里一名神山山產楊梅充貢梁任昉為郡守奏罷之相近有梅嶺為徽饒通衢又有吳源山嵒岨山俱界樂平

福山在婺源縣西南四十五里又名太極山府志云外翕內闢若城郭厥土左剛右柔明粵東湛若

水講學于此有總靈洞天窻洞其與福山對峙而
隔溪相望者為善惡二山祥符經謂善山神為王
惡山為夫人俗稱夫婦山

桃源大衝山在婺源縣東南六十里府志云懸崖
飛瀑數百尺西十餘里為龍行石石皆龍跡又七
里有龍洞宋延祐中判官許松賦詩禱雨有民命
望懸三尺水神功願乞一年秋之句投洞中雨隨
至東有鷹嘴山又有小歛山接衢州界

方山在婺源縣東二里五代士人朱寬讀書于此
墨池猶存寬仕南唐又三十里曰黃連山

石耳山在婺源縣東九十里界接衢州其高不可
仞計山之南北各有八景其支脉曰大鰲嶺相傳
洪水時有大鰲上此而名按府治亦有石耳山

龍尾山在婺源縣東百里芙蓉嶺之支也西連武
溪山石有羅紋可為硯又名羅紋山亦曰芙蓉溪
蓮花山在婺源縣東百里接衢州界羣峰聳萃狀

若蓮花中有龍湫禱雨時應

五珠山在婺源縣東北四十里山形橫峙凡五起
伏如貫珠然有龍湫旱禱輒應舊名五株山相近
汪口村東有烟樓峯遠望可百里宋岳飛軍于上
流中平鎮以此峰頂望敵人往來旌旗舉烟火因
名

圓鏡山在婺源縣北七十里山頂連峰插天山半
頓起華蓋其圓如鏡南有石筍突兀如圭璧相近

有高貴山

大廣山在婺源縣北九十里婺水出焉一名大尖山又十里有金剛山有黼峯有九陽凹山

浙源山在婺源縣北九十里一名浙嶺邑中諸水多西入鄱陽惟此山之水東會休祁黥縣諸水至歛浦又會績溪歛諸水赴浙江因名浙源之大灣有平鼻嶺

大連山在婺源縣北百二十里高四百仞周九十

里接休婺界昔鄉人避難于此

祁山在祁門縣東北一里三面皆石壁上有二巖曰棲真曰青羅旁有泉甘而冽

鳳凰山在祁門縣南又十里曰白石峯又十五里曰王公峯高出萬仞不與諸峰接

主簿山在祁門縣西六十里方輿記云昔黟縣有主簿愛此山幽竒遂解印來隱故名

歷山在祁門縣西八十里西界石埭山極高峻嶺

有巨池池中有石馬

新安山在祁門縣西百一十里奇秀異衆山郡名
新安取此與此山南北相望者曰九峯山又縣西
百二十里有西峯山上有銅鼎鐵笛錫杖唐五臺
僧所遺百四十里有五龍池山

道人山在祁門縣北二十里山半有巖巖前有池
又北十里有不老山出方竹

石新婦山在祁門縣北三十里有三石峯類人形

每霽色暉映雲霞明媚則若彩服靚粧者故名相
近有石鐘石筍二山相對

大共山在祁門縣北五十里界接石埭大共之水
出焉其地又有禾成嶺界接太平栢溪之水出焉
林歷山在黟縣西南十里四面壁立徑路危險吳
志云漢末土寇陳僕祖山等屯此賀齊平之今山
上寨洞遺壁尚存鋤者或得箭鏃山之東有石洞
可容數十人內刻石為佛像西瀑布自千丈崖瀉

下又有仙人棋盤石白常見金燈如千百流星飛
墜人多異之

武亭山在黟縣西南十八里橫江水出焉危巖削
壁宋時邑人黃元暉斲路行者便之

碧山在黟縣西北八里北接石盂南面靄峰為邑
之鎮又西北二十里曰章山章水出焉

戢兵山在黟縣北十五里本名石鼓山唐改今名
上有石鼓石人石驢相傳石鼓能自鳴則驢鳴人

哭後鑿破遂已

牛泉山在黟縣北五十七里東界太平輿地志云其山自麓至頂每九里一頓凡九頓並山為路隘處纔七八寸臨不測之溪上常多風故木雖合抱而長不及丈惟南向有之頂上有水冬夏不減名曰牛泉又北三里曰五溪山

三姑山在黟縣東北十五里一名吉陽山上有三峯其中峯有瀑布泉新安記云天將雨此山先有

鼓角之聲

東山在黟縣東十五里峭絕人跡罕到又十里曰石燕洞幽邃容百人

石門山在黟縣東南二十里鑿石為門下瞰深潭壁立千仞綠崖鑿路僅通人步絕處以木為棧古號小劍門有建中靖國年號鐫刻尚存

魚亭山在黟縣南三十五里方輿記云每歲江西魚船至祁門以次泊山之東故名

復山在黔縣南三十六里一名阜巖山方輿記云
山極孤峻石壁四絕僅通綫路其絕頂有泉常流
不竭昔鄉民常避亂其上賊意山高無水欲持久
困之鄉民投示以生魚賊遂引去其南為天潛山
以多隱君子得名

石照山在績溪縣東五里有石壁立方廣二丈光
可鑑物故名山後有石屋山如屋下如臺前出為
流雲洞

龍鬚山在績溪縣東二十里高五百仞山頂一池
雖晴明亦有雲氣旱禱輒應

大鄣山在績溪縣東六十里一名玉山是為邑鎮
高五百五十仞周百五十里秦立鄣郡取此相連
有雙峯山湖田山距縣百餘里有龍塘山麓從小
徑入縈紆嶮巖懸絕處則倚水架梁而進

唐金山在績溪縣東南九里三面臨水有泉出石
穴極清冷飲之可除煩熱

翠眉山在績溪縣西一里兩山低平橫立左右如眉故名舊有翠眉亭宋縣令蘇轍常吟咏其上

大會山在績溪縣西四十里高聳特出衆山環峙莫能並其巔晴霽時可望太平宣池又西曰漂山曰石鶴山聖泉洞又西曰古山

徽嶺山在績溪縣西北十五里一名大尖山徽水出焉王安石有度麾嶺詩作麾字又詩曉渡藤溪霜落後夜過翬嶺月明中又作翬字太平廣輿記

載績溪大嶽村改州為徽取此從徽字為是西北
連凜山佛論新嶺東抵叢山關南接大鄣水源有
二陰入旌德陽流歛浦

蘆山在績溪縣西北四十里山左之水東流過旌
德入揚子江右則南流經縣界通錢塘江

蒼龍山在績溪縣北十里一名蒼龍塢深邃窈冥
常有雲霧下有潭甚深俗傳龍藏于中因名洞中
舊有十景

大葵山在績溪縣北六十里其山周迴百里前路
潭水蹲形矯首有葵象馬山半有仙人崖

龍巖山在績溪縣東北二十九里其山四合中一
徑通寧國縣界舊有寨呼為叢山關下有巧溪
拔雲峯在城陽山右古志云高接天宇上遙雲族
有拔雲亭唐宣歙副使魏弘簡為張友正建古蹟
志山麓有呂涓讀書堂

登仙峯府志傳為仙曼都飛昇葵衣冠處峰頂有

飛龍坑澗水宛曲為都浴處名曰浴石相近有春
夏秋冬四山又有謝公墩謝安曾訪曼都過此

昱嶺在府東南百二十里山谷間無跬步曠者
宋岳飛開道由三嶺出遂為康莊境接杭之昌化
箬嶺在府北八十里上多箬竹唐汪華所開通旌
德太平為郡要衝又有雙嶺烏泥嶺嚴嶺俱相近
塔嶺在休寧縣南八十里接婺源界明正德中邑
令唐勳破桃源洞寇于此更名得勝嶺

芙蓉嶺在婺源縣東八十五里高幾千仞周三十餘里與對鏡羊鬪塔嶺及休之新嶺名曰五嶺其山之冢為芙蓉峯又名靈山中有碧雲菴旁有祖師石亭亭上有石筍高二丈其陽有五祖巖為南唐何令通棲真之所對鏡嶺在縣東九十五里羊鬪嶺在縣東一百五里明萬歷中邑令譚昌言以芙蓉往郡道險更闢徑于江灣之左近可十里遂名譚公嶺

赤嶺在祁門縣西百里嶺下有溪祥符經云昔人為梁取魚魚不得下遂夜飛越嶺而去人復張網嶺上飛不過者化為石其色赤吳都賦云文鯉夜飛而觸綸蓋此類也

榔木嶺在祁門縣東五十里嶺下水分東西東入錢塘江三百六十灘西入彭蠡湖亦三百六十灘嶺雖平坦以水勢觀之高可知矣

武陵嶺在祁門縣西四十里始極峻險唐縣令路

吳鑿為盤道至今便之

墨嶺在黔縣南十六里上產石墨土人採之久而成井

古巖在府西二十五里寒山里巖有石洞其上丹崖層峙鸞飛鵠立稜稜露石骨有巖橫亘形如覆屋可容十許席唐會昌中建古巖院名僧相繼出焉

蘭將軍巖在府南十五里舊志云隋蘭亮屯兵處

其地阻險

齊雲巖在白嶽西北路迴如線遊者緣梯以升所
經勝處極多乃至巖點祁歛婺之山一目可盡
也宋程秘書雲巖二字刻于石前一峰特起為香
爐峯又謂之凌虛巖明嘉靖中勅改曰齊雲山山
有五老峯南一石卓立曰天柱又獨聳巖北一石
洞屏榻整然殆異人隱處府志云殿創自宋寶慶
其像為百鳥銜花所塑後兩經火一髮不燬其異

如此

石橋巖在休寧縣西六十里一名岐山石壁千尺
橫亘如梁府志云唐刺史韋綬立精舍名石門寺
明湛若水講學于此建天泉書院有逼霄峯有金
紫太極諸巖

東密巖在休寧縣南三十五里周迴絕壁如城其
頂平行府志云唐末黃巢兵寇徽郡程灃率衆立
寨拒之今水池塹壘猶存

黃墩在府西三十里晉新安太守黃積卒于官子孫家此故名至今有墓存明程敏政易為篁墩以地多修篁其說無據梁程靈洗唐朱師古皆居此程為河南二程子之祖朱為婺源朱子之祖明歙令劉仲邑人趙滂修墓而建三夫子祠曰程朱闕里

靈巖三洞在婺源縣西北百二十里東北曰慶雲洞巖竇皆五色兩巖瀑流上有鸞鶴雲霞之象西曰

蓮花洞有大石室刻石像傍有羽蓋旛節皆乳石所成南曰含虛洞洞有二重中有仙雲帳雪崖香嶺又北曰瓊芝洞以石堅白得名實有四洞詳戴銑遊記又有六洞合為九產硯石色紫如肝瑩者可擬端溪

青岑洞在婺源縣西八十里南北門相通中有物象如靈巖三洞

練江環繞郡城揚之布射富賢豐樂四水分派合

流直瀉如練而抵于城南是名西溪一名徽溪其
水注于漁梁抵歛浦而合于新安江

新安江在府南凡郡六邑之水俱自歛浦流入為
新安江下流至嚴州合金華水入浙江其水淺深
見底為灘三百六十水經注云浙江又北經歛縣
東水甚清深潭不揜鱗沈約詩洞徹隨深淺皎鏡
無冬春是也

洋湖一名陽湖在休寧縣東南屯溪衆水所會也

黃墩湖又名相公湖在休寧縣西南四十五里即梁程靈洗射蜃處也

昉溪在歙縣北四十里因梁太守任昉得名唐大中時刺史盧潘改為任公溪上有石為任公釣臺屯溪在休寧縣東南會東南二港之水而東注歙浦

白鶴溪在休寧縣西二里發源黟縣吉陽山由白岳山下過藍渡至縣界與夾源水合東流于屯溪

與南港會是為東港

績溪在績溪縣東暈水與揚之水交流于此有如
績焉

南港在休寧縣南率水所會及諸山嶺之水俱入
于此

東港在休寧縣東白鶴夾源二水所會及諸山嶺
之水俱入于此接于南港

大小北港在祁門縣樅根九峯西峯五龍池諸山

之水名曰小北港王九嶺赤嶺良禾嶺厯山諸水
名大北港俱會于大共水

豐樂水在府西三里源于黃山湯溪南會曹阮二
溪過仙人臺溢于昌竭匯于狀元潭流經巖鎮賴
水會之又東南與富資水會流入于練江

富資水在府北一里出歙縣弱嶺會布射水入于
練溪下歙浦

布射水出歙縣黃蘗山元和志謂出飛布山南流

至縣治會揚之水注于歛浦

率水發源休寧縣率山其陽水南下而西流者過
饒州會于彭蠡其北水源有二皆自山巔瀑瀉而
下一從望仙巖流出梅溪口入祁門界合孚溪水
一從高湖尖流出彭汭坑口東與梅溪孚溪水會
又東至江潭溪浙源之水赴焉流經南港東港又
會于率口而入于歛浦亦名漸溪即古之漸江也
汭水在休寧縣南自璜源出汭口與佩琅水合匯

入南港一名紫雲溪

五城水在休寧縣南四十五里源出婺源五嶺流入縣境達于龍灣溪口

夾源水發源休寧縣西北四十一里石坼山南流環繞縣城如帶與白鶴溪水會流至屯溪入于歙浦

浙源水出發源縣浙源山東東流至休寧縣會休黥諸水東入屯溪又南入歙浦

武溪水出婺源縣浙源山西為浙源西水會于武
溪流經樂平入鄱陽湖又廬源水出廬嶺益陽水
出浙源山小歛水出小歛山濬源水出濬源山杭
溪水出石龍山俱入武溪

婺水出婺源縣大廣山過石門灘南繞于縣治又
南會于斜水入武溪水

大鱖水出婺源縣大鱖嶺有二東流者至衢州入
浙江西流者合斜水入于武溪

梅源水出婺源縣梅源山東會于浙源西合武溪
沱水在婺源縣其源有三一出金剛山為黃村水
一出平鼻嶺為燕山水一出九陽黼峯為理源水
合于三溪口南流會浙源水

繡水在婺源縣城北會諸山港之水繞城三面其
紋如繡下流入于武溪

大共水源出祁門縣大共山流至秀溪霄溪下閭
門灘會北港水直注倒湖入鄱陽又新安水出新

安山盧溪水出梅南山俱匯于大共水

赤溪水在祁門縣魚亭山有二東流者入于屯溪
西流者會大共水又有榔木嶺水亦東入屯溪西
會大共

章水出黟縣章山東南會橫江水入屯溪注于歙
浦

橫江水出黟縣武亭山東會于章水

吉陽水出黟縣吉陽山東過噎潭又東至白茅渡

會橫江水又牛泉水合于此

魚亭水出黟縣魚亭山東至魚亭口會橫江吉陽
二水合于章水

揚之水出績溪縣龍嵒山其一北流逕叢山關入
寧國界其一南流至大屏山乳水注之又南至靈
山暈水注之又南至象山又東會登源西會上溪
二水合流入于練溪又大小母竭水出靈山綿溪
水出佛論嶺昌溪水出柳亭山及休寧之武洪水

俱匯於此

嶽水出績溪縣嶽嶺東南流為嶽溪過來蕪渡入揚之水

乳溪水在績溪縣北東流為浣沙溪入揚之水

九龍潭在府境丞相原道中九泉瀆射破山而出雷砰電擊有若龍戰

石印潭在績溪縣南五里潭中有方石如印

玉龍潭在績溪縣西北二十五里潭中有巨石文

成白龍二長丈餘

歛浦在府南十五里今名浦口練江浙江合流奔
駛任昉赴郡有滄江路窮此湍險方自茲之句

呂公灘在歛縣東南十二里一名車輪灘湍悍善
覆舟唐刺史呂季重疏為安流遂名

閭門灘在祁門縣南寰宇記云衆水所注有兩巨
石對峙如門其灘流常覆舟唐縣令路旻開斗門
以平其險人呼路公灘後相繼疏導今為安流

深渡在府南四十五里新安江經此寰宇記云與睦州分界處峯巒掩映狀若雲屏實百城之襟帶宋元俱設巡司于此明廢

龍泉在婺源縣北七十里旱禱有應唐呂洞賓大書飛龍巖三字刻石尚存

洗心泉在婺源縣西四十五里福山寺右有異僧卓錫湧泉甃之則渾舊志云明湛若水講學于此湯泉在北黟山東峯下香溪中泉口大如碗可煬

雞一名硃砂泉

江南通志卷十五

欽定四庫全書

江南通志卷十六

興池志

山川 六 寧池二府

寧國府

陵陽山在府城內岡巒迴折府志云勢若蜿蜒為
一郡之鎮北自敬亭陂陀而南第一峯府治據之
二峯在府治西南別為鼇峯三峯在東北為府治

屏蔽宋郭祥正詩陵陽三峯壓千里百尺危樓勢
相倚危樓卽屏蔽也相傳府治晉桓彝時郭璞所
建林仁肇更創城制襟山帶水于形勢為勝區矣
上有樓卽謝朓北樓李白所稱江城如畫者

敬亭山在府北十里府志云古名昭亭東臨宛句
二水南俯城闔煙市風帆極目如畫山南有廣教
寺舊為黃蘗禪師道場唐丞相裴休所建今雙幢
院後金鷄井是其遺跡人南麓有井二俱裴休所

鑿舊經云裴相井在石菴院水白味甘特異他井
其虎窺泉九曲池諸舊蹟皆廢其東北有盤龍山
麒麟山東有甌山峽石山皆敬亭之支阜也

行廊山在府西名勝志云兩峯對峙環抱若廊廡
然上有盤石巨人跡府志相傳梁杯渡禪師過此
中有白雲池法雲寺下臨大明湖其西北牛頭山
又西北為方山

響山在府南二里宛溪之上俯瞰響山潭府志云

唐刺史路應跨潭為梁建兩亭于東西崖權德輿
為記

雙羊山在府南三里有雙石羊梅聖俞詩風雪雙
羊路梅花溪上村即此稍西為栢山

玉山在府南十里其上多古木蒼藤有惠昭寺宋
尚書梅詢讀書處李含章亦嘗隱此元張明有詩
云春風跨馬銀鞍穩夜月騎牛鐵笛閒蓋詠二事
也

嶧山在府南三十里盤旋隱秀上有項王廟甚靈
異舊志相傳羽起兵時經此又東十里為勞山有
大小二勞大勞有洞可容數十人

曷山在府南三十里按唐書文德元年楊行密攻
宣州客袁襲勸其速趨曷山堅壁以需又天復二
年行密遣兵擊宣州刺史田頰破之曷山即此嘉
靖志作蜀山誤

巖臺山在府南五十里舊志云由橫山趨北形勢

巉峭上有平臺下有石洞乳泉郡守羅汝芳有臺
端松抱石巖底墪棲雲之句其北為花田山

華陽山在府東南八十里名勝志云其山連跨宣
涇寧旌諸邑其西絕頂曰高峯巖出雲表山僧依
巖構屋覆以鐵瓦人多雜猿猱以居其南為密壠
嶺又盤嶺稍西為金牌嶺二嶺之間僅通一線為
涇旌間道郡南一阨塞也山之支壠為大小墨山
為洞山

橫山在華陽山北十里綿亘龍嵒其北為壁田山
孔川山東為魯山又東為新田山

稽亭山在府東南六十里祥符經云宣城稽亭山
古仙人嘗居此行人悅其幽曠每稽駐焉故名有
仙人巖三天洞可容百餘人洞有三竅通明流水
自內出可灌田旁有風穴又有暗洞皆深窅竒絕
莫可名狀

柏槻山在府東南七十里府志云山之陽即文脊

山也峯攢千仞谿迴百折與華陽連屬昔山僧以柏皮為視引水入厨因名其最勝者為飛橋構險凌空跨岫為梁名曰引虹其北為梅村山西為歙溪山歙溪山之東連岡迤邐沿河而走遙屬于水東諸山其西北曰查樹嶺自寧國至涇道此

水東山在府東南七十里大河東南有市有渡與水西山分峙

折山在府東南山勢旋折故名相傳奚氏女浣紗

於此仙去

麻姑山在府東三十里名勝志云相傳麻姑修煉之所有仙壇丹竈劔池石棋枰釣魚臺天遊亭諸迹其東有靈馬山西有碧泉山

雲山在府東北七十里下有金牛洞詳見古蹟祁門陳履祥講學于此山頂有巖書洞其北曰蔣山下瞰固城湖是為高淳南境

工山在南陵縣西三十里高數千丈盤踞七十里

縣治之鎮山也宋孝子李經廬墓于山麓其西峰下有龍湫北有石岡迤邐而東為石湖山水龍山黃連山同山

朗陵山在工山南晉何琦嘗隱此辟穀煉丹山南有丹井

射的山在南陵縣西寰宇記云山有玉在石壁內取之者遇風雨而止人望之如射侯因名

水龍山在南陵縣西南六十里有泉出山巔之石

巖噴五尺許濤湧而下田賴以溉卽漳水之源也
呂山在南陵縣南六十里有石室其南為石竇有
泉湧出淮水發源于此

格裏山在縣南七十五里從兩小徑入曰大格口
小格口兩山夾行十五里不斷中有腴田深澗人
烟相接

籍山在南陵縣城中東北隅由工山蜿蜒百折至
此陂陁聯絡為邑之鎮

神龍山在南陵縣東二十三里山從分界山來逶迤波陀卓起一峯如游龍昂首狀故名上有睢陽廟

水西山在涇縣西五里下臨賞溪循溪而入最幽勝舊建寶勝崇慶白雲三寺浮屠對峙樓閣參差碧水浮烟咫尺萬狀唐宣宗曾棲此有朝廷若問江南事報道風光在水西之句風光宣宗小字也晉葛洪劉遺民唐李白杜牧皆嘗遊憩馬相接者

有白雲山下有白雲潭

大寧山在涇縣西三十里唐猷州城在其下今大寧寺其地也上有伏虎石

藍山涇縣西六十里太白詩云藍岑聳天壁突兀如鯨額是也相近有郭山望江山望江之西有石礪洪頭山

五城山在涇縣西七十里五峯環列如城郭然

大城山在涇縣西七十五里與青陽縣接界下有

潮泉相傳邠璞所鑿以應江潮歲旱禱之潮應則雨否則旱又五里有碧山唐李白棲此

寶峯山在涇縣西八十里府志云石巖高數十尋
有入物鳥獸之狀若雕繪者山背有竇窅然出竇
而升則平遠空曠其下有瀑布飛流千尺鏗訇趾
下其對峙者曰銅峯山

石碧山在涇縣西北石壁四合如屋太白詩石碧
望松寮宛然在碧霄

魚磽山在涇縣西北七十五里府志云山下有泉
曰湧泉或云潛通江海嘗有魚隨泉而上者

仙洞山在涇縣西北八十里俗名和尚山山頂有
二洞甚深洞口僅三尺餘磬折可入內有煉丹臺
藥丸嘗滿見者隨取隨盈樵夫深入時聞絲竹奕
碁聲

幙山在涇縣北五里舊志云隋左難當與輔公柘
拒戰于此軍幙四周因名故壘尚存北為桑坑山

東為漢山桐山

琴高山在涇縣東北二十里名勝志云山半有隱
雨巖又有洞傳為晉處士琴高隱此而名其隔溪
對峙者有巖窰洞山中有複洞不柱而屋巷闔幽
竒

崑山在涇縣東北三十里其頂有池冬夏不竭旁
有朝陽洞遙峯嶺

金壺山在涇縣東二十五里石壁峭拔五十丈有

平臺

北衝山在涇縣東三十里兩山相並環以清溪相近有巧坑山多怪石暮溪出此又東十里曰慈坑山坑口有觀音洞烏溪出此

眉山在涇縣東六十里下有眉臺眉池相近為貂蟬山

百湖山在涇縣東六十五里與嶽之箬嶺相接形如舞袖溪流遶之百折而出

黃幕山在涇縣東南十里高百餘丈與縣治對旁
挾兩山左曰屏黃山亦名桂嶺其形似樓臺右曰
寨山形似屏皆山之分脈以為縣基

硃砂山在涇縣東南五十里名勝志云巉巖險峻
俯瞰長流有石赤如日故一名丹山相傳石艷發
則有災異先是絕壁不通宋尚書郭夔鑿道跨一
橋以濟

黃峽山在涇縣東南六十里高五百丈羣巒列嶂

狀若蓮花為縣治之祖丹溪之水出焉旁有嶺曰
百花尖又有筆尖山其南曰湧溪山產茶

承流山在涇縣南四十里九峯羅列與縣治相拱
揖峯巒聳秀甲于一邑宋許國公吳潛讀書于此
又有許竇二真人遺蹟

黃象山在涇縣南九十里碎石五色返照有光舊
有寶光菴昔人詩云猿抱子歸青嶂外鳥銜花落
碧巖前

駐蹕山在寧國縣南一里府志云明太祖嘗駐蹕于此故名又南四里曰雞山一名鳳山峯巒秀拔為邑之鎮

陽濠山在寧國縣南三十里最高為邑南嶂絕頂有龍湫噴湧而出遙望如練相近有琴山又南二十里有屏山

了髻山在寧國縣南八十五里舊志云南唐時嘗作烽燧樓其上外有仙燕洞舊時鄉民避兵之所

千頃山在寧國縣南百三十里府志云與浙江昌化縣接界上有池其大千頃其流南入昌化北注寧國

籠叢山在寧國縣西南百五十里其南屬績溪界峻壁崇闕為宣歙阨塞官兵常駐此防戍焉又縣西八十里有塵嶺山亦稱險阨與籠叢相埒唐汪華嘗駐兵有藏馬洞卓戈泉

獨山在寧國縣西五里為縣脉來龍東散入平野

為縣治

石鼓山在寧國縣西九域志云上有石鼓天雨則
鳴

紫山在寧國縣西百里縣志云高數百仞周二百
里中有龍池龍井石塢石鼓諸勝

石鏡山在寧國縣西百一十里有龍巖瀑布又有
石鏡能照人

文脊山在寧國縣西北三十里府志云高數千丈

周三百餘里西接涇旌諸山北為宣城之柏枧峯
巒攢秀巖洞盤旋郡雄鎮也寰宇記云一名曷山
山門山在文脊東南峭壁劃然中開儼若城闔府
志云晉瞿硎先生隱此中有六洞曰紫雲曰夕陽
曰朝陽曰明心曰碧雲曰漣漪洞前有瞿硎樹為
先生手植一本三花即桓温命伏滔作贊處

國朝施閏章山門遊記

寧郡西萬山其磔硎而鎗矜者
往往竅為洞穴而其環山皆洞

交屬旁通者莫如山門巖石環亘中豁如甕城高
廣數丈其西為文脊峯中多平野山為邠廓其前

後高下以洞名者曰朝陽曰紫雲曰連漪曰杳祀
曰龍潭相距不一里許朝陽者南向爽塏戶牖三
面蓋瞿硎先生披鹿裘坐石室處東百餘步徙怪
石中側墜下者紫雲也宵深而明時出雲氣自西
北穿礧谷深黑可三百步灑灑聞流泉僧炬而導
客南出于山之尻所謂連漪者也左陟山椒右陷
而中虛崖罅有杳祀樹洞以是名其稍遠者為龍
潭大旱不涸龍窟其中嘉靖間土人塌水灌田雷
奮龍見日為晝瞑其水東北逕連漪合流匯于港
口其餘如竇如井多深隘不可入春夏水漲灌輸
萬竅衆山怒號若考鐘鼓始入門曰靈巖寺有古
木數十圍人稱瞿硎樹其新闢而菴者在腹曰鑿
鐵在背曰竹影皆隨山架宇倚石為壁曲榭層樓
人蹈空際而所謂鑿鐵者又一小石門中有獅子
峯倚天昂首環顧崇巖萬怪竦疊余少而聞之將
老而遊春日既佳歡興殫洽樂其洞穴之幽而多

軒豁通朗給人遊目類有道而能容者時無瞿矚
先生石室闐然然其人遁跡韜光不與人接而桓
溫造訪物色使代滔作贊溫故自可哉千
百世下求斯人之車塵馬跡又可得哉

鴉山在寧國縣西北三十里接廣德界寰宇記云
山產茶味與蘄州所產同梅聖俞所謂茶味鴉山
佳者也

冷度山在寧國縣東九十里山有五峯東曰桂山
西曰金字南曰青紅北曰周壁東北曰黃封連綿
蜿蜒經數百里

東山在寧國縣東南五十里山南谿洞逼隘至此獨豁然開朗下有渡曰石口即東谿所經也

閭口山在寧國縣東南六十里又名獅象山兩峰錯峙若門其中徑隘溪深巖坪泉田多油漆紙皮之利坪盡山高有懸崖隱洞飛瀑龍湫

天目山在寧國縣東南百五十里山本浙西巨鎮邑中諸山皆其支脈實有藩屏之勢

棲真山在旌德縣西五里神仙傳云昔竇子明為

陵陽令三年避劉聰亂棄官尋山採藥結廬於此
後仙去

正山在旌德縣西三十里峭峻特出諺云正山峩
峩接星斗分列岡巒九十九上有仙人臺響石亭
玉井東有郭公巖巖傍刻珍珠泉三字南唐將方
道項洪銳嘗屯兵于此相近者有柵山其南有大
幕小幕二山

石柱山在旌德縣西六十里雙石挺立高數丈有

巨石承之上有豹子尖梁程靈洗討侯景立幟于此築歃血臺又嘗抽矢射山石摧一角因名其石曰射的山

天井山在旌德縣西北三十里山有兩竇飛泉出焉俗呼牛鼻水下有龍潭

石壁山在旌德縣北二十五里兩崖對峙一水中流最稱阨塞舊路躡懸崖上行旅恐懼胡安定周竹坡嘗作歌紀其艱險明嘉靖間通判李默緣溪

鑿石成徑始為通塗

龍首山在旌德縣北四十里西北有龍潭徽水經其下與涇邑接境

鳧山在旌德縣東名勝志云相傳竇子明既仙去其二女亦化為青鳧上昇故名其陽有玉壺山山阿有龍潭

梓山在旌德縣東南二里近俯城闈遠凌岫壑為一邑雄覽旁有奇石石上有桃樹不花而實

蛟山在旌德縣西南五十里山形蟠虬若騰蛟然
後有洞徑險難入其中平曠可居又西十里有九
峯山

黃山在太平縣南三十里當徽寧二郡界高數千
仞盤亘三百里圖經稱為軒轅棲真之所上有古
木靈藥流泉香美能已百病按舊志云山有三十
六峯屬太平者八曰翠微曰天都曰望仙曰九龍
曰聖泉曰疊嶂曰仙人曰芙蓉餘詳徽州府

陵陽山在太平縣西六十里西屬石埭北界涇邑
一名三台山有竇子明遺跡下有三門六刺灘李
白渡此有詩其南為真金山東為密崖山

仙都山在太平縣西六十里一名遊山府志云舊
傳左難當因唐推功不及居此

龍門山在太平縣西北四十里巖壁峭拔中有石
竇如門產茶及諸藥草

尚書山在太平縣西南二十里相傳隋末有尚書

胡裕居此

通靈峯在寧國縣北二十五里四山環繞獨缺其北巖頂有龍湫有石巉然曰雞冠石

黃高峯在旌德縣西南四十里兩峯對峙獨秀雲表有登仙橋獅子巖硃砂石壁相傳有黃高公者隱此

桓公嶺在涇縣東烏溪嶺東茹麻嶺北道通旌太稱險阨即晉內史桓彝戰死處壘塹尚存

楓樹嶺在寧國縣廛嶺北二十里府志云與獨蛇
伏嶺分水叢山四闕皆茂密險隘之地明嘉靖中
建哨臺其上又北曰雲門山蟠龍山

千秋嶺在寧國縣東百五十里府志云岡巒纏屬
谿谷陰深路通浙江于潛楊吳招討使李濤攻吳
越取道于此宋南渡後嘗列關防戍唐羅隱送梅
處士有回望千秋嶺上雲之句土人以雲氣占晴

雨極驗

大嶺在旌德縣西旌諸嶺之最高者

春嶺在旌德縣北三十里自鳧山華容峯橫亘二十里南障縣治北界涇邑土人謠為蠢嶺

南長嶺在旌德縣南一里為徽寧二郡孔道

箬嶺在旌德縣西南八十里高五百仞跨旌太之間為新安間道南隸歙縣

鐵甲嶺在太平縣西二十三里峭壁下臨大河中一綫通往來行者足懾

三門嶺在太平縣北十里三方阻絕中道一徑縣
治據其陽

青弋江在府西六十里發源黃山會石埭太平旌
德諸水下流漸廣遂為通津北至蕪湖入江

九曲河在府城東源出嶧山受陸家潭水西北流
入宛溪

三汊河在府治東宛甸二溪至此合流東岸為新
城西岸為館驛李白有題宛溪館詩

灣沚河在府治北有渡有鎮今為鹽埠北出揚青
口合黃池流入于江

蒲橋河在南陵縣東二十里上自麻園河來下流
蘆港口與西河水合中有都堂壩雙澗虎狼澗
麻川在太平縣東南三里源出黃山之麓由湯泉
至麻陂潭又名白虎潭受旌德諸水逕縣治東門
會富溪梅溪西北下焦灘至麻口逕舒溪蟠石赤
溪諸水延袤八十里出小河入于涇

南湖在府東北四十里南曰南埒北曰北埒總稱南湖周廣四十餘里其東北有綏溪一名白沙溪約廣德建平之水入于南湖郡治以東諸川流俱歸焉其水西出渾水港達于大河有塞口榴堆二山對峙

宛溪在府城東源出新田山納諸水而來委蛇數十里故曰宛溪上下兩橋上曰鳳凰下曰濟川並跨溪上唐李白詩兩水夾明鏡雙橋落彩虹兩水

謂宛句二溪也

句溪在府東三溪流迴曲形如句字源出寧邑
籠叢山北流為水東水西為後潭又受華陽諸水
又西為陸家潭為東溪至此始名句溪李白詩洗
心句溪月謂其清也

華陽溪在府東南七十里源出華陽山隨境著名
東北流為魯溪入河

青溪在府南一里相傳竇子明釣白龍處李白有

詩

龍溪在府北七十里水陽鎮東西兩岸宋紹定中建浮橋今廢為渡有水兌倉有義倉東岸水碧橋與高淳接界

慈溪在府東北合高淳水至此入河由牛兒港東通五堰往東壩者由此

賞溪在涇縣西南一里涇水流至縣西為賞溪北入于青弋江賞溪之西有所謂新河者宋崇慶中縣尉

劉誼所開以溪流東徙為民田害欲挽之使西也而卒無成效又縣東有烏溪縣南有楓村溪俱合于此麻溪在涇縣西南百里即太平之麻口下流也山環水會舟行勝境唐杜荀鶴詩麻溪清徹底是也距溪三里有溢灘下即九里潭又下為羅浮潭

琴溪在涇縣東北二十里源自寧國界歷石門至琴高山過崑籠寺與賞溪合世傳琴高釣魚于此今三月三日出小魚寸許名琴魚又名藥植魚蓋琴高

丹萍所化也

藤溪在涇縣東南八十里桐嶺之南源出嶽嶺過旌德三溪至縣界納諸溪澗之水北入巖潭與賞溪合縣境東南之水此為最大

東溪在寧國縣東五里源出天目山北流過落花溪又受孔關千秋嶺湯公山陳村博里溪塘千頃山洋丁源諸水是名杭水又北為東溪至五河渡與西溪合流入于宛溪

西溪在寧國縣西五里即西津渡源出績溪龍叢山北流逕叢山關過橫溪謂之徽水西南諸水多入馬北受滑渡環川葛村龍潭諸水縣西川流盡匯于此是為西溪又北與東溪合

鳧溪在旌德縣東北受鳧山西南之流入于徽水又有楊村溪受鳧山以北春嶺以南之水與大河合

梅溪在旌德縣十一都大嶺以東剝嶺水俱會

於黃沙澗入寧國縣又有雪溪在十都亦東入寧
邑

舒溪在太平縣西六十里源出歙縣逕石埭東北
至涇陽受婆瀼二溪水東北合麻川入涇縣界為
賞溪上源水淨沙平焦竑所云十里無波也

三港在南陵縣出西南諸山而襟帶于縣城中者
為中港出工山朗陵之陽流于縣西者為西港合白
石灘諸水而繞于縣後者為後港皆合于漳淮下流

橫澗橋水在府南十里源出橫山之麓北逕岩臺
又歷花田西山桐子岡會于此橋入宛溪宋郡守
張果抱民籍入水死處

淮水在南陵縣源自呂山湧珠泉與漳水合流其
下流又有小淮水之稱

漳水在南陵縣源自縣南水龍洞流至澄清河與
淮水合寒流曲折清澈可愛

涇水在涇縣南合舒溪麻溪徽水三大水源出石

埭太平旌德至邑治合流而北環抱城外縣以此得名

徽水在旌德縣北源出績溪徽嶺之陰北流受清潭水至縣東北霞溪東溪入焉又西北流與抱麟溪玉溪合是為三溪豐溪水亦入焉北至龍首山入于涇

黃池在府北百二十里一名玉溪會郡治東南之水以出大江南屬宛陵北隸姑孰

響潭在府治響山下潭水泓澄丹崖下瞰舟行與山谷聲響相答

敬亭潭在府治盤龍山下泓深莫測歲旱於此挹水以雩

奎潭在南陵縣東北六十五里凡九十九曲中饒菱芡水族

桃花潭在涇縣西南九域志云唐李白與汪倫萬鉅遊于此潭上有釣隱臺彩虹岡壘玉墩皆當時

遊咏之所李別汪倫詩所謂桃花流水深千尺
即此潭也

落星潭在涇縣西五十里藍山下相傳晉時漁者
見星隕潭中故名

巖潭在涇縣南十里受石埭旌太諸水合賞藤二
溪翠壁澄淵山水清妙

衆尋潭在寧國縣西三十里潭際石阜壁立下有
龍湫深不可測夾岸桃花十數里俗稱桃源

染浦在南陵縣東北四十里一名白家湖廣千餘畝中多芙蓉菱芡之屬吳赤烏元年建浮城梵剎于中風景為勝

南香澗在涇縣東五十里源出黃沙嶺西會羅溪水歷茶溪會周公坑後村諸水合于烏溪

池州府

齊山在府南三里有峯十餘其高齊等故名或因唐刺史齊映有善政名之按唐書映未刺池其弟

照池州刺史訛照為映理或然也舊志云山分三面巖洞三十有二嶺塢泉石亭臺不可勝舉為名

勝之區

附

明劉岐齋山記

近名山而遊者陟之賦之觴之止矣葺一居設一

勝又止矣有于齊而剖其疑者乎有于齊而補其闕者乎李太白秋浦歌秋浦千重嶺水車嶺最奇或以水車當陽春似矣郭功甫之詩又曰萬丈水車嶺夫陽春未可云萬丈也然牧之南亭詩曰二嶺桃花紅錦黥則不獨一陽春嶺矣以太白久于秋浦遊江祖遊白詩遊桃波遊大樓遊鰓湖道必出齊山齊山湖前曰平天坂太白歌已及之未有咫尺翠微而不知眺詠者水車之為陽春似足信耳楊廷秀詩曰謫仙狂飲顛吟寺小杜倡情醉上樓齊山之經太白豈非確據哉或以蘇子瞻遊清

溪而不遊齊山為惡按清溪詞曰望翠微兮古招
堤非齊山寺而何或以沈叔達謫池州卜居齊山
曰雲巢今不知古屋所在以形勝揣之其近書院
乎益延慶寺在前舍書院無平行地矣孔叢甫齊
山寺詩曰飛甍仍在最高巔則山椒之有層蘇可
知矣今延慶之址漸入原隰難云最高也又曰太
子池塘烟漫漫池郡自昭明而外別無太子故實
今齊山之池塘何有乎齊山湖之前有平天湖朱
子九日登天湖用杜牧齊山登高分韻人固以為
平天但于登字非宜然其句全用杜語又朱子別
賦水調歌頭亦然安得謂非齊山乎張敬夫登齊
山曰憶行西湖岸亦復多欵峯頰恨入力勝刻畫時
見侵誰知能石面乃亦變孔壬何如榛莽間屹立
長森森天然抱幽獨妙賢逢賞音此直似齊山勝
西湖矣南軒之意意嘆臨安痛心朝士借西湖以
寓其刺譏然雕繪多而天然少亦武林之寶錄乎

謂齊山為幽獨亦指其僻處江澁而言埒視西湖
欣賞不謬讀詩而不以意逆可乎人言齊山之草
不宜芻牧故本朝于池州不設衛所果爾則齊山
翠微寨馬軍寨何以稱焉此皆齊志之疑也貴池
立州治始于刺史李芄芄刻齊志于有待岩若不
可考而殘文之傳者無能表章其失一李方元刺
池搜剔齊山之勝池人知有齊映杜牧而不知方
元其失二紫微刺池齊山客也張承吉張喬齊山
主人也和登高韻者不勝數和南亭僧舍韻者未
之前聞忘其主人其失三岳忠武駐節廬山往來
岳鄂數蒞池州又刻石蒼玉之間而齊山不為特
祠其失四政和中張先生修長生術結廬齊山尸
解去而志不載其丹房其失五張國安詩曰水石
嵌空二百巖今名于志者巖僅十有一其失六蘇
元鼎詩曰巖根堆雁塔當日若有浮圖又曰碑珉
黃閣相齊映若有詞章今並未從辨證其失七楊

建秀詩曰樓臺玉殿雲中見紺宇之盛勢髴可徵
今臺榭俱蕪其失八陳鴻斷碣林繹之題名卦著
二刻邈不可得見其失九池口陳應台敬宗黃瀾
伯觀讀書翠微未留唱和其失十山有泉有井不
共疏濬之其失十一此皆齊志之闕也岐生長于
茲年踰六十時時策杖齊山莫敢決其疑亦莫能
縫其缺記
以質焉

太樸山在府南二十里俗名太婆山宋周必大謂
不典更今名其山內聯六峯外托九華

萬羅山在府南二十里舊志云與江祖石隔溪相
對上有羅人石李白秋浦歌謂邏人橫鳥道江祖

出魚梁是也

六峯山在府南二十里府志云六峯競秀望之如列屏然

大樓山在府南四十里李白秋浦歌行上東大樓者指此

三十六山在府南七十里府志云雲峯六六上插晴空鳥道而上曰麻塘嶺

七井山在府南八十里與石埭分界上列七峯湧

泉七穴其麓盤迴數十里遙接九華

盧子庫山在府南九十里一名伏龍巖世傳有龍
化人于巖前未全而止又有龍池雩禱常應相近
有魁山

白面山在府西南名勝志云雲崖拱北若傅粉下
有白面渡匯于秋浦

南泉山在府西南七十里有泉唐貞元中創寺于
山陽太和元年賜額南泉承恩寺

郎山在府西南七十里下有玉鏡潭水經注云貴池水出縣南郎山是也相近有姥山一作舞山有宋陶亮砦址又宋沈攸之大破賊于赭圻賊奔姥山即此

烏石山在府西南七十里與姥山相對唐廣德初宣饒賊方清陳莊據此刺史李芄討平之

秀山在府西南八十里疊嶂如屏貴池在其下梁昭明太子冕服陵在焉宋陸游入蜀記云秀山梁

昭明墓拱木森然也相近曰雙溪山秀峯山

石門山在府城南九十里其上有青尖唐高齋隱
居之地春臺巖高齋所築桃花塢本李白與高同
遊處也存石刻大小十六字

石橋山在府西九十里西峯山之東兩峯相對一
石跨之若梁梁下奔泉泐石從穿山洞而出

魚載山在府西南百五十里山有懸泉從石壁斷
崖三級而下注于潭中上有巨石倚附飛流如鯉

魚狀

黃山在府西南百八十里上有三十六垣與歛之
黃山三十六峯相峙其最高者古牛岡可望匡廬
靈山在府西南二百里黃山之支也其巔有田百
畝有泉灌之不竭

孝姥山在府東北二十里瀕江有孝姥廟

碧山在府東十里瀕湖蒼崖翠巘倒影沉碧稍南
曰石壁山以形如削壁也

渚湖山在府東南四十里絕頂有田淵泉旁出澄泓如練蒹葭魚鷺若渚湖然故田無旱憂

五山在府東南六十里孤峯獨出其下散為五支聯絡相屬巍巍然實為羣山之長

青山在青陽縣北五里縣以此得名

靈鶴山在青陽縣西南十里世傳白鶴真人隱此山之南舊有夏玉翠瀑二亭山半有逍遙臺

九華山在青陽縣西南十里一統志云高數千丈

延袤百八十里舊名九子山唐李白陋其名無所
據以山有九峯如蓮花易今名南唐齊丘致政後
隱此號九峯先生其巖洞峯壑凡九十有九泉石
諸勝不可縷悉為江南名山之最劉禹錫嘗謂太
華之外無竒女几荆山之外無秀及登九華而後
悔其失言

聖祖仁皇帝南巡時遣使至山賚

御書九華聖境四大字懸化城寺寺東巖有飛來石最竒

古其北連冠幘山層峯巍峩如冠幘狀附唐李白

九華山聯句序

青陽縣南有九子山山高數千丈上有九峯如蓮花按圖史名無所

依據太史公南遊畧而不書事不經故老之口復闕名賢之記雖靈仙往復而賦咏罕聞予乃削其舊號加以九華之目時訪道江漢憩于夏侯迴之堂循落岸憤坐眺松雲因與二三子聯句傳之將來

明王守仁九華山賦

循長江而南下指青陽而幽討啟鴻濛之神秀發九

華之天巧非效靈于坤軸孰構奇于大造遷史闕而弗錄豈足跡之所未到白詩鄙夫九子實茲名之所萃余將窮秘密之崔嵬極遐搜而歷考涉五溪而徑入宿無相之窈窕訪王生于邃谷淘金沙之清潦凌風雨乎半霄登望江而遠眺步千仞之蒼壁俯龍池于深窅弔謫仙之遺跡躋化城之縹

縹飲鉢盂之朝露見蓮花之孤標扣雲門而望天
柱列仙舞于晴昊忽雙峯之闢門真人駕陽雲而
獨躡翠蓋平臨乎石照綺霞掩映乎天姥二神升
于翠微九子隣于積稻爽歌起于玉甌爛石碑之
文藻回澄秋于枕月建少微之星旄覆瓶承滴翠
之餘瀝展旗立雲外之旌纛下安禪而步道遙覽
雙泉于松杪踰西洪而憩黃石懸萬丈之瀨瀨瀨流
觴而縈紆道石船于澗道呼白鶴于雲峯釣嘉魚
于龍沼倚臺碧之嵬岬謝塵寰之紛擾攀齊雲之
巉峭鑑琉璃之浩淼沿東陽而西陞餐九節之蒲
草樵人導余以冥探排碧雲之瑤島羣巖翳其輦
鶴失陰陽之昏曉垂七布之沈沈靈龜隱而復跳
展高僧而孫招賢開白日之杲杲試朝茗于春陽
汲垂雲之澗漱凌繡壁而據石屋何文殊螺結之
蟠糾梯星辰而北盼陞遺光于拾寶緇裳遊于黃
匏休圓寂之幽悄鳥呼春于叢篁和雲韶之鶯鳴

喚起促余之晨興落星河于簷椽護山嘖其驚飛
怪遊人之太早攬赤木之如濯被晨暉而爭蛟靜
鏡聲之剝啄幽人劇參巖于冥杳碧雞噉于青
林鵬翻雲而失皓隱鴝藥于摻蘿挾提壺餅焦而
翔繞鳳凰承孟冠以相遺飲沆瀣之仙醪羞竹實
以嬉翔集梧枝之嫺擲嵐欲雨而霏霏鳴濕濕于
豐稂躡三遊而轉青峭拂天香于茫渺席泓潭以
濯纓浮桃瀉而揚縞綜澌澌而絡蔭飲猿猱之捷
狡脫斧柯而昇大還望會仙于雲表憫子京之故
宅歎知微之碧桃除金光之閃映躡異景于穹坳
弄靈珠于赤水舞千尺之潛蛟并花塘而峻極散
香林之迴颺撫浮屠之突兀泛五釵之翠濤襲珍
芳于絕巘負金步之搖搖莎羅躑躅芬敷而燦耀
金幢玉女之妖嬌拳龍鬚于靈寶墮鉢囊之飄飄開
仙掌于欽欽散清馨之迤迤披白雲而蹠崇壽見
參錯之僧寮日既夕而山暝挂星辰于窿窳宿南

臺之明月虎夜嘯而熊咆鹿麋草遊于左右若將
侶幽人之岑寥迥高寒其無寐聞水壑之洞窟溪
女厲晴龍而曝木雜精苓之春苗邀予觴以玉液
飲玉粒之瓊瑤盍辭余而遠去颯霞裾之飄飄復
中峯而悵望或仙蹤之可招迺下見陽陵之蛇蟻
忽有感于子明之宿要逝余將遺世而獨立採石
芝于層霄雖長處于窮僻迺永離乎區囂彼蒼黎
之緝緝固吾生之同胞苟顛連之能濟吾豈靳于
一毛矧狂氛之越獷王師局而奔勞吾寧不欲請
長纓于闕下快吾生之鬱陶顧力微而任重懼覆
敗于或遭又出位以圖遠將無蒞于鷓鴣嗟有生
之迫隘等滅没于風泡亦富貴其奚為猶榮葬之
一朝曠百世而興感蔽葢雄傑于蓬蒿吾誠不能同
草木而腐朽又何避乎羣喙之啾啾已矣乎吾其
鞭風霆而騎日月被九霞之翠袍搏鵬翼于溟渤
釣三山之巨鼉道崑崙而息駕聽王母之雲璈呼

浮丘于子晉招句曲之三茅長遊于碧落共太
虛而逍遙亂曰蓬壺之藐藐兮列仙之所逃兮九
華之矯矯兮吾將于此巢兮匪塵心之足攬兮念
鞠育之劬勞兮苟初心之可紹兮願永矢弗撓兮

魚龍山在青陽縣南七十里深谷中有大小魚龍
洞水分七流互相貫通多奇勝接石埭界

龍池山在青陽縣東南七里有石池不竭相傳龍
居之下巖有二竇出泉日三度曰潮泉可溉田宋
令曹機築方塘構亭于上其嶺有石橋飛泉懸瀑
最為奇勝

讀山在青陽縣東二十里有洞如垂鐸石皆青黛
色宋范仲淹讀書于此故名或以為即古長山誤
又東二十五里曰石龍山又東十五里曰峯山大
有山皆與九華競秀

木瓜山在青陽縣東三十里唐刺史杜牧禱雨處
有祭木瓜山神文

五松山在銅陵縣輿地紀勝云舊有松一本五枝
蒼鱗老幹青翠參天因名李白在此題咏甚多前

有鐵船山

銅官山在銅陵縣寰宇記云昔產銅有泉源不竭可浸鐵烹銅唐置銅官場宋置利國監歲久銅乏場監俱廢麓有惠泉流為惠溪從樊港入江稍西有銅官渚唐書僖宗文德元年楊行密龍襄宣州進兵銅官渚即此

葉山在銅陵縣東郡國志云形如卓筆上有蓮花峯靈竇諸勝葉法善修煉于此故名山陽有

阿泉從懸瀑而下至葉廟伏流地中亦一奇境也
葉山之東有獅子峯百丈峯馬鞍峯而獅峯最
奇特有噴珠泉其平脊有宋所建清涼寺侍郎
羅京故宅在焉

石耳山在銅陵縣南舊志云兩峯並峙一石高
丈許有巨人跡名真人峯

天門山在銅陵縣西南四十里高聳雲表有天門
泉續文獻通考云泉流永城埭至荻港入江山下

有晉天福中所建寺宋嘉祐中賜額梵天又西南有五峯山自天門山逶迤而起五峯峻削如指泉

亦澄澈

附

唐李白天門山銘

梁山博望闕扁楚濱夾據洪流實為吳津

兩山錯落如鯨張鱗惟海有若惟川有神牛渚怪物目為車輪光射島嶼氣凌星辰卷沙揚濤弱馬殺人國奉呈瑞時訛返珍開則九江納錫閉則五嶽飛塵天險之地無德匪親

鵲頭山在銅陵縣北十里與大江之西岸鵲尾者相對江中則鵲洲也即春秋時鵲岸六朝置鵲頭戍今俗呼十里長山有城泱鎮唐書云懿宗咸通

六年置鵲頭鎮即此

杏山在銅陵縣東三十里舊志云晉葛洪種杏燒丹處山素產土硃土人以為丹礦也麓有花堰泉相近有石光山夜常有光

城山在銅陵縣東郡邑志俱云四圍石壁峭立惟南一徑可通如城門山頂平坦可數百畝中有一井遇陰晦則雲氣湧出

鳳凰山在銅陵縣東五十餘里世傳有鳳凰集其

上石窟有泉珠璣錯落名鳳飲泉宋太宗時賜道士趙自然

金山在銅陵縣東南三十里有金牛洞南有鬪牛洞舊傳上有鬪牛遺跡

陵陽山在石埭縣北五里山有三峯其東峰屬太平縣中峯山半有丹臺竇子明得仙處旁有丹竈丹井山麓有黃鶴池白鶴墩黃鶴林皆子明遺跡晉郭璞詩陵陽宜丹砂指此

金城山在石埭縣西二里宋開福寺在馬山列寺
旁宛若城郭又西三里曰萬春山圓墩小埠巖巖
如走珠松木蒼鬱

雨臺山在石埭縣西十五里山七十二折望之如
蓮汎水舊名蓮花峯頂平如掌五代時西峯禪師
卓錫于此建海獅菴一泉隨錫而湧名龍井亦名
西峯井泉今禱雨輒應

魚龍山在石埭縣西三十里山最峻聳有二洞大

者洞口一池水紺碧色口內奇石各異狀土人云
中有綠魚白鳥歲一見之也其小者相去半里許
北接青陽界

七井山在石埭縣西七十里其山與貴池接延袤
數十里中有七井炎暑亦涼上有望夫尖竹木蕪
翳多產藥材

城子山在石埭縣西九十里環繞如城前有紫
潭

慈雲山在石埭縣西百三十里有慈雲洞深可三四里石乳凝結有石磬石板擊之錚然有聲

雙塘山亦名桑塘在石埭縣西五十里有泉淪茗數日不變

杉山在石埭縣西百六十里有待月螺髻等峯最高者曰鐘樓尖有蓬萊第一洞洞口低狹漸入寬廣容數百人

標山縣志作厯山寰宇記云石埭縣西百六十里

有標山高五里與祁門太平接壤其山石壁峭削
下有龍池可百畝池右一石高丈許直裂為二中
擎一丸又一石鏡縱橫二丈光明可鑑人物皆奇
跡也其並峙者曰峒山具泉石之勝

蘆山在石埭縣南十五里東連鳳凰山南接穰嶺
巖深林密隱者多結廬于此其西曰駝山狀如負
重

蓋山在石埭縣南三十里屹立河濱望之如蓋隋

地理志云涇有蓋山有舒姑泉相傳舒氏女坐泉處仙去按石埭自涇縣析置

五溪山在石埭縣南百二十里上有五溪合流而下

白象山在建德縣治北縣之主山也以形似名旁有蛻龍洞

博陽山在建德縣東十里有滴水巖及鯉魚石蚌珠石佛石

五龍山在建德縣東三十里五峯森立山半有石井名化龍池深不可測

玉峯山在建德縣南半里絕頂有石光瑩如玉宋巖華募漢武帝石刻壽字勒于山半名壽字崖
三面山在建德縣南四十里有石笋白如人面者
三故名

梅山在建德縣西南十里巖壑頗勝

歷山在東流縣東三十里南望匡廬西瞰江渚

最為雄傑上有池二一久雨不盈一久旱不涸下有仙姑井觀者呼仙女則花湧出

延壽山在東流縣東六十里懸崖壁立有泉噴流又東十里曰列疊山

香山在東流縣南四十里疊鄣層巒有石巖泉洞之勝相近曰隱山一峯峭絕

水車嶺在府西南六十里峭壁臨淵奔流衝激若桔槔聲唐李白詩所謂秋浦千重嶺水車嶺最奇

是也

鹿運嶺在府城東三十里相傳高僧盧公面壁於此鹿為運水故名一名滄鹿嶺

清泉嶺在青陽縣西十里道旁一泉出石罅初名

鮑泉繼名趙泉宋真德秀過此為易名清泉作

銘系之附宋真德秀清泉銘芙蓉嵯峨與天相摩流與天通秀綠

浮河地靈脉潤如江之沱乃吐斯泉于山之阿行道渴飲孰曰弗過淨洗五濁澡雪百疴涓涓無窮

廣濟寶多餘潤所被尤尤泰禾上善利物其達盈科名揭而清萬古不磨

鳳凰嶺在石埭縣西南百二十里嶺下有三溪合流處有巨石橫亘如埭中一石四方平廣尤覺傑然下有石竇最深縣所由名也

普門嶺在建德縣西南十五里宋朱子至此書普門嶺三大字刻于石

西峯巖在府南九十里石臺上有巨人跡南為西峯洞頂有龍池從石壁瀉水伏流地中至劉村口小澗仰噴而出

紫巖在府西南三十里有泉曰紫泉宋周必大錄
云池陽三十里至紫巖產紙處即此

水簾巖在建德縣東七里俗名夫子巖梅堯臣有
水簾巖詩

石礮磯在銅陵縣北五里瀕大江有三石門水洄
可出入容數十人亦名五霞洞

祝家磯在東流縣北五里橫江激湍舟行甚險昔
有祝姓者施纜于此以濟往來故名

黃石磯在東流縣東北五十里濱大江旁有黃石
港多黃土巨石相綿亘

古仙洞在府南六十里古仙峰下舊志云世傳此
洞為神仙窟宅中有石碁局鉦鼓在焉

白雲洞在青陽縣東二十里洞多怪石秉炬入遊
竟日莫測其底

龍池洞在建德縣東四十五里良禾嶺下石室高
敞有池三懸瀑如足練下注

迎春洞在建德縣東南七里高深如屋傍有兩石
穴可秉燭入名藏春洞

大江在府北五里上自雁汊東流縣界下自大通
鎮抵荻港入繁昌縣界計一百八十里

李陽河在府西六十里源引大江以江流之消長
為盈縮一名李王河府志云自河口出江有石槎
枅橫突為攔江羅刹二磯南唐周湛鑿支流以避
其險謂之新河後磯勢頗安而支流漸侵蓄民田

正德中作堤郭之雜剝磯在大江中其上有叢篠
喬木明黃觀殉節于此

池口河在府西五里即貴池水也唐以此名州古
稱貴口亦稱鱣口宋時始稱池口沈仲玉至貴口
不敢進齊書云沈仲玉自鱣口欲斷江李安民進
軍破之胡三省通鑑注云即今之池州貴池口也
其源五一出石埭一出古源一出考溪一出石嶺
一出東源匯于秋浦由杜塢入池口以達于江

清溪河在府東北九域志云池州貴池縣有清溪鎮其水源有二一源出西南之洮溪與棠溪峽川之水交于白洋匯于江祖潭是為上清溪一源出縣南太樸山注于白沙河蝦湖東塘湖合三水下流是為下清溪東北五里入江

梅根河在府東四十五里源亦有二一出九華由五溪折流于五埠溝一出太樸山瀉于馬牙橋遠龍潭與五埠溝之水交于雙河以入于江吳置治

於此謂之梅根治宋有鑄錢監故又謂之錢谿按
宋書鄧琬傳陳慶至錢谿不敢越于梅根治若按
此似錢谿梅根治一地而略相隔也

大通河在府東北六十里其源七自青陽者四自
銅陵者三俱會于車橋河至大通鎮入江

五溪河在青陽縣西二十里源出九華山一曰漂
溪二曰澗溪三曰雙溪四曰曹溪五曰瀾溪會于
六泉口經五溪橋至梅根治入江

臨城河在青陽縣南自分流嶺經峽山而西會于大通河

博山河在青陽縣南七十里其源四會于陵陽鎮由琉璃嶺下入于石埭之舒溪

管埠河在青陽縣東北二十五里其源九會于石堰經木竹潭與東河諸水合流于大通河

銅陵河在銅陵縣西北七里其源三會于橫塘舖入市後湖達于江

荻港河在銅陵縣北八十里源出朱村會各鄉之水至北下社入江

饒河在建德縣南九十里一名龍口河其源三匯於昭潭合於饒河迤入饒州之獨山湖西達彭口入于江

香口河在東流縣南六十里源二一出彭澤山林港一出陳蒼原交于三汊繞查池為香口河入江又縣南一里有江口河

黃湓湖在府西北九十里湖口通江多魚舊設河泊所

大清湖在東流縣東北四十餘里澄澈如鑑流至黃湓入江

蓉溪在青陽縣南五里其源六會于臨城河

舒溪在石埭縣續文獻通考謂之旋溪本陵陽子明垂釣處後以舒氏三女仙去故名舒溪溪源一出太平縣之弦歌鄉一出縣之舒泉鄉經城南合

余溪嶽溪諸水下涇縣至蕪湖入江溪中有輓轆石
在城南五十步許其水激石旋轉有聲即有賢士
出

璉溪在石埭縣西南八十里其源二一出大字坑
一出石門坑合鴻陵溪管溪經石埭達貴池之池
口

貢溪在石埭縣西南九十里經杉山之麓西流入
貴池之秋浦

曹溪在石埭縣西南百二十里源出鳳凰嶺西流
為五溪之一

茹蘭溪在建德縣東南城下其源出迎春朝霞兩
洞西流入堯城溪春夏水溢可通舟楫

玉鏡潭在府西南七十里江祖潭下數里許

上下雲潭從九華山翠蓋峯發源飛流激石而下
上潭有三汲亭下潭有雪浪亭俱廢中流一石名
釣臺其旁瑗珞亭如流蘇也

雪潭在石埭縣西五里石壁山下長廣數畝而深不可測俗傳源通大江

陵陽潭在石埭縣迎寶門外泉源淵深澄碧可挹相傳竇子明放白龍于此

秋浦在府西南七十里舊唐書云隋置秋浦縣因水為名舊志云長八十餘里濶三十里按今地有石城至池口皆是四時景物宛若瀟湘洞庭

浮桃園在青陽縣碧桃巖下懸水西南趙知微植

桃千株鄉人因以致富

上下華池在青陽縣九華山與雲峯山兩山合而成流上華池即龍池下華池下注逆上激水最奇亦產異茗

龍池在九華山絕頂其上為五龍灣每一灣為一池注下為千尺泉龍所宅也旱禱輒應復注下為弄珠潭出伏龍橋流為五溪之一

嘉魚池在九華山雲峯龍遊澗下池中有石臺乃

寶子明李化文垂釣處其水深三四尺峻壁四合
上有二水湊為垂瀑中多異魚

老龍池在石埭縣大宇坑左右夾以峭壁人跡罕
至禱雨時架木而上秉燭從石竇入四五里許以
綆繫抵池取水水得即雲雨隨之

東坑泉在府西百里毛嶺北發源僅濫觴流出漸
大東注玉鏡潭隨地作堰一十五所

真珠泉在青陽縣東三十里泉出纍纍如珠

漱玉灘在青陽縣雙石巖東漱石琮琤有戛玉聲
宋陳巖有水石相逢驟作聲鏗然律呂自天成之
句

白筇陂在府西南二十五里唐處士鞏疇棲隱處



江南通志卷十六